

HEZKUNTZA. Selektibitatea ikastoletako ikasleen %98,48k gainditzea, «kalitatearen seinale» dela adierazi dute

Eskola itun berriari buruzko gogoeta sustatu nahi dute Partaide ikastolek

Topaketak egingo dituzte, Donostian, *Ikastolak eta etorkizuneko eskola ituna* izenburupean




Eider Goenaga | DONOSTIA

Partaide Ikastolek, Eusko Jaurlaritzarekin Eskola Itun berria lantzen hasi beharko litzatekeela pentsatuta, gaiaren inguruko gogoeta sustatuko dutela iragarri zuten atzo. Helburu horrekin, etzi eta otsailaren 6an topaketak egingo dituzte Donostian, *Ikastolak, partaidetza sozialeko eskolak, eta Eskola Ituna* izenburupean —egitaraua taulan—.

Eskola Ituna 1993an sinatu zen, eta 1998tik amaituta dago, beraz itun berria landu behar dela uste dute Ikastolen Elkar-
tea-Partaidetik. Ituna sinatze aldera, baina, erantzuna behar duten hainbat galdera daudela esan zuen Koldo Tellitu Ikastolen Elkar-
tea-Partaideko lehendakariak. «Eskola itun berri bat posible al da gaurko egoeran? Zeintzuk lirateke eskola itun horren edukiak? Akordio horretan alderdiak zer egiteko prest daude? Beraz, ikusita eskola itun horren inguruan galdera mordoa dagoela, gogoeta egiten hasi behar dugu eragile guztiek», azaldu zuen Tellituk.

Gainera, Tellituk gogorarazi zuen Jaurlaritzan dauden alderdiek hauteskunde programan Eskola Itun berria lantzeko asmoa aipatu zutela. «Hurrengo legegintzaldian, gizartean eztabaida eta adostasun prozesua landuko dugu Eskola Akordioa

Araba, Gipuzkoa eta Bizkaiko Hezkuntza Sareko emaitzak



lortzeko», adierazi zuten kanpainan, eta Ikastolek eztabaida hori sustatuko dute, hainbat erronka kontuan hartuta.

Tellituk esan zuenez, 1993tik hainbat aldaketa eman dira gizartean, eta irakaskuntza munduan ere aldaketa ugari izan da; beraz, horiei erantzun behar die Eskola Itunak. «Bestetik, Euskal Herrian, hezkuntza sistema propioaren eraikuntza erronka eta aukera bilakatu zaigu. Beraz, aurreko erronkei erantzun beharra izateaz gain, herri bezala ere berezko erronkak ditugu», gaineratu zuen.

Ikastolak «erreferente garbia» kalitateari dagokionean

Topaketekin batera, Ikastolen Elkar-
tea-Partaidek aurrematrikulario kanpainako iragarkia ere aurkeztu zuen, eta aukera baliatu zuen Partaide Ikastolak «kalitateari dagokionean hezkuntzako erreferente garbia» direla nabarmentzeko. Hala, Eusko Jaurlaritzak emandako datuetan oinarrituta, 2002ko eskola emaitzak aztertu zituzten prentsaurrekoan.

Datuek, bereziki, selektibitateari egiten diote erreferentzia. Partaide Ikastolen eta gainontzeko ikastetxeen arteko emaitzak erkatzen dira, eta batxilergo eskaintzen duten Arabako, Gipuzkoako eta Bizkaiko 24 Ikastoletako ikasleen emaitzak

TOPAKETEN EGITARAUA

URTARRILAK 30, OSTEGUNA

09:30: Hasiera ekitaldia.

09:45: Abel Ariznabarreta EAEko Hezkuntza sailburuordearen hitzaldia: *Datorren hamarkadako hezkuntza erronkak.*

12:00: LAB eta ELA sindikatuekin mahai-ingurua: *Hezkuntza sistema propio baten eraikuntza sindikatuen ikuspegitik.*

16:00: Ikastoletako lan talde baten lanaren aurkezpena: *Irakasle-ratioaren inguruko azterketa eta proposamena.*

18:00: Francesc Colomer irakaslearen hitzaldia. Kataluniako PSCko hezkuntza arduradun eta Hezkuntzako koordinatzailea da Bartelonako Diputazioan. Hitzaldia: *Hezkuntza, Komunitatea eta irakaskuntza kalitatea. Hezkuntza agenda berria.*

OTSAILAK 6, OSTEGUNA

09:30: Mikel Agirregabiria Hezkuntza Administrazioaren funtzionarioaren hitzaldia: *Hezkuntza gastua eta irakaskuntzaren kalitatea.*

12:00: Ikastoletako lan talde baten lanaren aurkezpena: *Ikastolen gastua eta itun-moduluen azterketa.*

16:00: Eusko Legebiltzarrean ordezkariak duten alderdi politikoen mahai-ingurua: *Hezkuntza sistemaren azterketa eta datozen urteetarako aurreikuspena.*

18:00: Amaiera

biltzen dira. Datuen arabera, Ikastoletako ikasleen %98,48k gainditzen dute selektibitatea, gainontzeko eskoletan %96,3k gainditzen duten artean. Emaitzei erreparatuta, ikastoletakoek soilik gaztelaniako ikasgaietan ateratzen dute nota baxuagoa, beste ikasgaietan nota altuagoak ateratzen dituzte.

Tellituk gustura agertu zen datuekin: «Erreferente bihurtu gara gure hezkuntza sisteman, eta datu hauek erakusten dute kalitate mailan ere erreferente garbia garela».

GAZTELUKO PLAZA. Beste hiru lagun errugabetu ditu epaileak; gazteen abokatuak helegitea aurkeztuko du sententziaren kontra

Hamabost hilabeteko zigorra ezarri diete zazpi gazteri protesta batean gertatu istiluengatik

Erredakzioa | IRUÑEA

Hamabost hilabeteko kartzela zigorra ezarri die Iruñeko Lehen Zigor Epaitegiak zazpi gazteri, joan den 2001eko uztailaren 27an Iruñeko Gazteluko Plazako aparkalekuaren kontrako protestan, «agintaritzaren agenteen aurkako atentatua» egitea egotzita. Beste hiru gazte errugabetu ditu epaileak.

Sententziaren arabera, Gazteluko Plazako aparkalekuaren aurkako ekitaldiek «ordena publikoko istilu larriak eragin» zituzten 2001eko uztailaren 23tik 26ra, eta, «istilu gehiago gerta ez zedin», 27an, polizia jarri zi-

ren plaza inguruan. Egun hartan, ordea, «istiluak eta atxilotaketak» gertatu ziren sententziaren arabera. «500 bat lagunek manifestazioa egin zuten eta haietako batzuk hiriko altzariak apurtu zituzten. Atxilotetak Alde Zaharreko hainbat tabernatan gertatu ziren, egun hartako 20:00ak eta 22:00ak artean», gaineratzen du sententziak.

Helegitea aurkeztuko dute

Atxilotutako gazteek ukatu egin zuten epaiketaren istiluetan parte hartu izana, eta hala jasotzen du sententziak. Epaileak, ordea, hamar gazteetako hiruren hitzak besterik ez ditu egiaztat jo-

eta errugabetu egin ditu. Gai-
nontzeko zazpiei, berriz, hamabost hilabeteko kartzela zigorra ezarri die «bake publikoa larriki asaldatzeagatik, eta eragindako kalteengatik».

Gazteen abokatu Jokin Elarre-
rek gogor kritikatu zuen sententzia, atzo. «Epaiketako froga ez du kontuan hartu epaileak. Benetan Gazteluko Plaza suntsitzen ari direnak libre dira, eta gazteoi hamabost hilabeteko zigorra ezartzen diete».

Zigor-aurrekaririk ez dutenez ez dute kartzelara joan behar izan, baina, hala ere, sententziaren aurka helegitea aurkeztuko dutela azpimarratu zuen



Gazteluko Plazako eraikuntza lanengatik izandako istiluak, 2001ean.

abokatuak. Gaineratu zuen litekeena dela Gazteluko Plazako istiluen inguruko gainontzeko epaiketako sententziak ere

atxilotutako gazteen aurkakoak izatea. Otsailaren 13an izanen da hurrengo, 2001eko abuztuaren 1eko gertaerengatik.